

摘藻堂四庫全書薈要

集部

欽定四庫全書薈要

集部

文安集卷五

三至

詳校官助教臣謝登雋



欽定四庫全書薈要卷一萬六千三百九十四

集部

文安集卷三

元 揭傒斯 撰

題明皇出遊圖應制

明皇八駿爭馳道還是開元是天寶
長安花發萬年枝
不識韶華醉中老
奎章閣下文章靜
冕旒端拱唐虞聖
此圖莫作等閒看
萬古君王作金鏡

畫鷹

文梁五色條秋高意氣豪怒張兩目直霄漢豈與短翮
翔蓬蒿妖狐畫作猛虎嗥騶虞并與神麟逃嗟爾飽食
心空勞

題張使君棄官學道詩卷

至元天子朝萬國任丘使君謝病歸門前未罷車馬客
身上已著朝真衣致君堯舜在豪傑洗耳巢由何是非
棲雲觀裏青松樹惟有白雲終日飛

登祝融峯贈星上人

洞庭南桂嶺北衡山連
延瀟岸黑中有祝融如結鬟
嵯峨七十二峰間
祝融不自知千山萬山自迴環
迴環面芙蓉起祝融正在芙蓉裏
儼如天仙朝紫皇千官百辟遙相望
半夜每瞻東海日六月常飛滿樹霜
龍拏鳳攫熊虎躑雲山霧滅何時極
我來正值太平時時有山僧似疇昔
憑高一覽四海空
草間培塿安足雄
盤盤羅漢臺
翕翕炎帝宮
復恐九天上視我猶井中
朔風日夜

相騰蹙谷老崖堅松栢禿古來鉄丸盡颺揚山上至今
猶版屋山僧勸我歌我歌徒自傷天下五岳嵩中央此
山與我俱南疆我今三十始一見北望中原天更長

送何太虛南歸

窮秋乍到深冬別來已俄然去忽然學士已分修史祿
道人特送賣丹錢單車欲發無三日幾處同行可百年
積雪堅冰愁客路徐州城下便通船

憶昨四首

天歷年中秘閣開授經新拜育羣才宮門待漏常先到
講習收書每後回召試時蒙天語勞分題不待侍臣催
滿頭白雪丹心在太液池邊只獨來

宮草葱茸禁樹齊日趨延顥對凝暉朝迎步輦花間立
暮送回鑾柳下歸碧殿東浮蒼巘合金河北引玉泉肥
幾迴弘慶門前路春氣濛濛欲濕衣

己巳羣儒映壁奎端陽侍燕寶慈西線分學士親臣送
詩賜皇宮御手題注酒含春瑤露重承塵轉午錦雲低

日斜共出西門道既醉猶能散馬蹄

奎章分署隔窓紗不斷香風別殿花留守日頒中賜果
宣徽月送上供茶諸生講罷仍番直學士吟成每自誇
五載光陰如過客九疑無處望重華

題李安中白翎雀

白翎雀白翎雀每見灤河河上飛平生未識百禽性不
敢籠向江南歸

寄題胡氏園趣亭

日與世情遠學人聊治生畦蔬多品類樹果各生成野
老過偏數山禽近不驚詩書吾所好農圃也須明

題文瑞圖

并序

常德之龍陽居多蜀士祠事梓潼君甚嚴祠前有池曰
景星咸淳癸酉蓮兩葉並蒂者六劉初登進士第延祐
甲寅兩花並蒂孫以忠登第天歷己巳華如甲寅城東
三雅湖蓮復三華並蒂海魯丁獲獨步丁馮天澤聯貢
而獲獨步丁登第好事者寫以為圖邀余賦詩

蓮花復蓮葉並蒂更連莖並葉已不見三花兩花更有
情如何與人作嘉瑞偏向龍陽水底生龍陽家事梓潼
君花花葉葉梓潼神好在龍陽士汝但讀書更績文為
華為葉汝莫論

題南頓孔氏復明詩卷

失明非有故復明還自然方其失明時萬事俱棄捐外
雖無所睹內則常淵淵如未嘗有目不喜亦不憐如明
入地中明未嘗不全逍遙天地內如在天地先不助亦

不忘一氣自周旋不敢計此生敢計時序遷剥乃復之
始自坤還至乾忽如浮雲散還我蒼蒼天昔非果失之
今亦固有焉如何孔氏家母子仁且賢先後俱失明其
復皆十年十者數之終如月晦必圓養之固有道何疾
非所痊願言永保之毋或忽此篇

奉同柯博士甘內掾下直賦

暮出閭闔門解鞍坐前庭泠泠草露白華月隔林生蟋
蟀奮哀響鴻鴈流遺聲常恐芳景晏不知寒節并萬物

肅將斂孤懷徒自盈捉衿激長謠淒泊諒難徵

賦得海上雲送良上人歸徑山

蕩蕩無邊涯悠悠何所之孤飛若有意羣往更無疑稍
拂搏桑樹還經若木枝迎陽成五色乘陰忽四垂作態
離仍合多情去却追因風過別島和月下蓬池且任從
龍去寧知到岸時惟應學空者澹泊與相期

吳子高悼亡歸岳陽

都門落葉滿遊子去京畿忍聽離鸞操遙逐秋鴻飛愁

霜曉入鏡淚雨夕沾衣
烟樹黃河岸風帆采石磯
平沙迴渺漫寒宇曖熹微
客心閑轉切鄉書近却稀
夢聞兒女泣行將童僕依
竊慕漆園放誰云潘岳非
乘濤慣不險迴江望若圍
武昌未易到更向岳陽歸

秋夜作

露下氣逾肅月高寒欲流
落葉階前樹疎鐘城北樓
衰年對急景歸心臨莫秋
當世非無意才薄徒淹留

進士張于高得邛州判官歸成都

邛竹山前負弩迎去年曾是一書生
天寒劍閣猶車馬雪滿繩橋正甲兵
即恐徵求民力竭莫將憂患客心并
六千餘里關河路不盡深期遠別情

題陶淵明歸興圖

家貧無酒飲聊欲試絃歌去家百餘里邈若異山河
江上日多風浩浩水增波門前五柳樹繁蔭日婆娑
秫田已成收歸計當如何

寄題傳尊師兄弟所作寧壽道院

鍾榮之山千萬峰
琵琶塵湖相疊重
兩翁入谷起臺殿
半夜空山聞鼓鐘
猛虎時逢澗邊石
飛龍却是雲間松
黃庭書罷人難見
鴻寶披殘手自封
度壑采芝隨鹿跡
登屋望日躡雲蹤
已知塵世惟堪笑
不是神人定少逢
辟穀有方桃更美
園基無地橘相容
但餘一念封人祝
未與人間萬事慵

二月朔日雪中題歐陽少監所藏宋好古畫竹

晨朝下延閣
貽我翠琅玕
微霜著節勁
細霧入林寒
歌

枝偏稱遠壓葉更宜攢
孤石覆逾潤橫波晴不乾
况茲春雪裏相對五雲端
誤當裁汗簡誰擬截漁竿
惟應湘浦上歸共幽人觀

雲錦溪棹歌七首

雲錦溪中雲錦鮮
好在高秋八月天
西蜀錦江那得似
西湖綠水更須憐

纔過浮石是藍溪
溪上青山高復低
山中泉是溪中水
尋源直到華山西

藍溪南去到藍州水底蘄蘄石不流迴望朱宮雲霧裏
白雲深處更高樓

宮前梨浦白茫茫岸上人家不似牆能到此中還有幾
行人莫厭棹歌長

揚金橋望玉真臺臺下橋頭人往來崇文宮裏看華去
安仁縣裏賣薪回

挹僊亭下薛公橋紛紛抵暮更連朝唯有橋西楊與柳
無情長繫木蘭橈

溪上層層雲錦山垂楊盡處是龍灘不是孤舟來逆上
何人知道世途難

御書雪林二字賜趙中丞應制

聖主揮毫臨秘閣親臣執法坐崇臺祥雲五色從天下
彩鳳雙飛映日來政欲清如林上雪已聞聲奮地中雷
君臣千載明良會咫尺薇垣接上台

題胡虔汲水蕃部圖應制

沙磧茫茫塞草平沙泉下馬滿囊盛曾於王會圖中見

真向天山雪外行聖德只今包宇宙邊庭隨處樂農畊
生綃半幅唐人筆留與君王駐遠情

題辛澄蓮華觀音像應制

至人不可測宴坐青蓮華珠纓被玉體白毫貫彤霞從
何得此相來置玉皇家

杜節婦詩

結髮事夫子長言兩相期語宴方婉孌生死遽分離室
中無長子堂上無翁姑生計日蕭條誰分心不渝良馬

不亂羣仁鳥不亂行昔者為夫婦今忍遂相忘生為董
家女死作杜家婦安能若流水東流復西注春秋陳時
祀蘋藻宿所共一朝祭無主焉得不忡忡灼灼庭中花
落落俱為實賤妾在空閨志願從此畢

題內府畫四首應制

韓滉土星像

五行土居中百獸牛有功土行降為神騎牛髮翁翁有
土復有牛惟神賜年豐誰知韓滉意政與皇心同

曹將軍下槽馬圖

曹霸畫馬真是馬宛頸相摩槽櫪下卓犖權奇果如此
豈有世上無知者朱絲不是凡馬韁天閑十二皆龍驤
曾從天子平四方畫圖仿佛餘驪黃華山之陽春草長

韓幹馬

韓幹畫出曹將軍幹惟畫肉猶逼真昂藏回顧欲飛去
老奚安知馬有神想當此馬未畫時朝刷吳越莫燕秦
頓轡長鳴風動地不數驂騑與騏驎當時用舍那知許

粉墨蕭條尚雄武千金駿骨何足論萬世長留羣玉府
宋徽宗成平殿曲宴蔡京圖御畫御記

東京諸蔡滿周行延福成平樂未央十畝松篁籠玉殿
九霄風露濕霓裳君臣契合同堯舜禮樂光華邁漢唐
明日圖成仍作記千秋留與監興亡

送秘書李道濟赴峽州幕

蓬萊道山芸閣裏赤甲白鹽蓮幕中十載同朝君獨去
三年佐政我難同大河水滿中宵雨鉅野樹涼清曉風

夷陵江頭幾日到迎親應先南飛鴻

奉送全平章赴江西

聖主思南土明公起集賢直期凋瘵後共致太平年
金虎分符重文龍賜服鮮權綱兼將相標格近神仙
天地三江外星辰北極邊丹心齊出處素志在陶甄
請述江南事都非大德全但徼扶弱美竟坐抑強偏
無復同憂樂徒令舞智權平疇吹渤澥暗室仗戈鋌
貪競明相訓忠良默自憐民心隨日壞世態與時遷
况復兵饑接仍

聞疫癘纏誅求殊未已
蝨賊轉相挺若擬寬憂顧先須
解倒懸久饑寧擇食多病但求痊
一語堪懲勸微機足
轉旋已知平似水更道直於弦
遙想聞公志渾如望歲
然九重天上別百丈霧中牽
日月明金節山河入畫船
四方初息馬五月正鳴蟬
豐樂田多黍生香灤有蓮
岱宗標魯地廬嶽壓湖天水
怪收崩浪山靈掃瘴烟
歡呼麟鳳出踴躍吏民先
笳鼓趨雄鎮旌旗覆廣川
下車和氣應袖手頌聲延
膏雨侵淮甸仁風扇海壖
忠貞真世

篤調燮有家傳赤子皆同體蒼生且息肩龔黃須警策
方名在蕃宣

題青山白雲圖

蕭寥青山曉迢遞白雲生衆樹春已暗高原人未畊方
思看桃去復擬采苓行深谷無機事白髮枕松聲

桃花鸚鵡

嶺外經年別花前得意飛客來呼每慣主愛食偏肥才
子憐紅嘴佳人學綠衣狸奴亦可怕莫自戀芳菲

趙孝子

廬陵趙孝子四歲父行賈一去三十年家惟大母母大母已云沒而父行不歸兒長亦有婦母子聊相依從父自北來汝父久已死母子哭且問父死何鄉里聞汝父死時不知汝父處汝但欲往問京師多舊故再拜別阿母行行至京師自念不見父兒死無歸時乃有曾老者往昔與父善言汝父死處濱州利津縣徒跣二千里薄言至利津朱琪張文輩一一陳所因死以某年月葬以

某木棺姓名某所題近在城南端城南冢累累翳然榛
莽中極目千萬塚能誰識其蹤行哭七日餘欲死不得
所生者無由知死者豈能語解髮繫馬鞍負之墳墳過
吾父儻有知髮解鞍自墮俄至一墳前鞍墮髮自解開
墳見前和題字宛猶在既見父姓名痛絕心始安函骨
陳野祭禽鳥聲為酸隣老四面來驚歎未曾有相帥報
縣官縣官駭之久即日上大府大府咸異之次第聞中
朝行子正南馳行子行且傷哭踊如初喪路遙山川阻

何時至故鄉故鄉既云至葬祭無違禮母子永不離萬
事若流水聞者盡稱孝見者皆感泣期爾百歲昌望爾
百祿集兒今一無願願母長不老歲歲父墳前灑飯墳
上草

題姑蘇陸友仁所藏衛青印

白玉蟠螭小篆文姓名識得衛將軍衛將軍今何在白
草茫茫古時塞將軍功業漢山河江南陸郎古意多

廬山連尊師求真陽詩久諾而未作也一夕夢中

得之因書以贈

稽山之漫不可滅焦石之烈不可絕香爐峰頭按羽節
滿山桃花滿湖月

贈項鍊師

吾聞有一士邈在吳越間騎虎滄海上茹芝天台山年
約四十餘七里布其冠燕趙雖曠絕倏忽一往還樵子
常見之徑去不可攀又聞好賣藥往往在市闕疾者得
寸匕立欲生羽翰吾常慕其人咫尺限河關道書讀萬

遍不如一承顏弱至揜昏氣卑卑逐王官何為浪自苦
食息於人寰

送鄉人祐上人從師歸當陽

學道玉泉寺從師天子都流年春事半歸路客帆孤山
勢遙連蜀江聲不入吳故園如可到種芋有遺區

送蘇尊師歸茅山

華陽隱居者聞復有蘇仙時向梅花下高枕石頭眠劍
匣出飛電琴心流暗泉閑來京闕下夜夜夢雲邊

寄題張齊公廟

東安猛將張齊公十八奪父軍囚中至元召募起亡命
父子南伐收奇功酒酣一躍馬上立拔劍四顧轟雷風
十年轉戰江漢上萬里直挽安南弓乾清坤夷四海一
勲在旂常心帝室身封萬戶傳子孫誓不偷生汙天秩
天下豐盛大德年天子明聖宰相賢小臣劉深射功利
上疏自薦能開邊鬼方寡婦號八百嫂叔操戈自爭國
劉深一言取大官遠帥官軍臨險阨五溪運糧數萬家

哭聲震動湖南北發徒開道徑折節既勤其民大求索
斗量金珠谷量馬谿壑之欲安可塞此時張公亦在行
捐軀力諫皆莫克折節薄險伏四起劉深夜遁張公死
鳥飛不度山川愁坐看英雄化為鬼乃知自古守邊鄙
大忌邀功貴寧救張公廟食東海頭劉深梟首蠻烟裏
張公世為忠孝門劉深萬年穢青史兩家同死不同心
試與題詩作臣軌

寄題楊教授菊莊

歸人種菊處乃在東海涯幽香發清真正色間奇葩百
種猶未愜千株寧足多寒分石橋月晴通赤城霞特起
表陰祀羅生騁陽阿門巷掩蒿萊荒徑絕經過飲露咀
其英孰知年歲遐

番禺蕭性淵攜其祖將領所愛唐琴號霜鍾者還
自和林求詩六月三日午門宣赦後作

嵩州昔有蕭將軍讀書學劍天下聞南隨龍馬渡江去
尚有孤琴傳子孫孤琴云是唐人斲昔日軍中自行樂

至今猶存殺伐聲一鼓哀風振寥廓將軍之孫才且良
文能作賦武蹶張秦皇城下飲白馬祈連山中射白狼
時平好文不好武抱琴却歎儒衣誤昭王臺上看青春
彭郎磯頭夢歸路日長史館幽且閑正冠拂琴為我彈
京城六月日如火霜鍾半夜鳴空山南風自有虞廷操
可惜同心不同調捐琴決眼望青天今日天門有新詔
送王伯循編修赴南臺御史

朝辭禁苑暮南臺驄馬翩翩道路開佐邑已知為治最

經邦正賴濟時才人情好惡非相遠民力凋殘實可哀
鵲鶚秋天須搏擊郊原恐有鳳麟來

寄題鄴下樊氏鍾秀園

鄴都雄地理樊氏好園林庭戶花陰合池臺樹色深佳
時惟飲酒永日自彈琴車馬如相訪流泉可洗心

題廖氏皆春堂

時清日月明心和寒暑平東風扇萬物華間語流鶯農
興水泉動蚕起桑柘榮牛羊被原隰麟鳳在郊坰少者擊

壤歌老者鼓腹行不知天壤內何物異吾生常願天子
聖四海無苛征夔龍滿廊廟簫韶歌九成

大熱疾勢危甚項君子虛視之一藥而起為賦五

言一首以謝

天台項子虛乃是列仙儔賣藥都市中疑是韓伯休欲
見不可得不見忽相求神清骨秀聳蒼松倚丹丘又如
霜空月下照千文流時有揭子者卧病城南陬馳往施
寸匕大暑生清秋人言死復生仰視行雲浮長揖忽不

見思之生白頭

周氏教山驛水木清華亭

周家亭子教山上斷隴連岡紫翠開晴日卷簾幽鳥下
微風倚柱白雲來松間漁艇時俱放竹外樵歌晚獨回
咫尺紅塵車馬地已如弱水限蓬萊

題趙照磨虛舟

剡木作孤舟乘風到處遊寧求觸無怒政用載能浮歸
共唯明月行隨只白鷗浩然江海上何懼復何憂

送毛真人還龍虎山

手綰銀章主秘祠，翩然歸去忽如遺。
塵湖龍井雲間上，鳳曲鸞歌月下歛。
香逐蘅薇深更入，氣交梨棗靜偏宜。
南屏風雨平坡雪，爭似山中夢覺時。

南屏山在上都南七十里，歲扈從至。

上都夏秋居焉，平坡在大都西四十里，西山之上，冬春居焉，蓋皆所掌秘祠所在。

故中憲大夫嶺北行省左右司郎中蘇公志道哀

詩

蘇公廊廟姿，推擇起為吏。論議動引經，舉措必由義。惟

時方大旱謂咎在寃滯決獄天乃雨凶年化豐歲流聲
滿山西憲府立羅致慨懷平生懷遂佐直指使受命安
邊鄙正色行使事邊臣既威服使亦免顛躓六曹收雄
材兩府資遠器激昂天下事往往見謀議十載拘掾曹
彌年困文字雖云富匡贊豈足盡材藝一命廁省僚勾
稽得深弊銓選班爵冗出入錢穀細並緣出多門穿穴
肆姦利有如水 upstream 驅去還復至因風一披蕩暫得免
蒙翳再命主賊曹持平獨丕蔽恒求情中實動究法外

意功罪必誅賞善惡俱惕厲三命參宥密令聞益昭晰
和林誇大漠肇造此根柢東際瀚海頭西控流沙裔北
窮陰山外南倚兩都勢連營列萬里倉庾千萬計鎮以
磐石宗重以分省寄憶昔大德末成廟方厭世桓桓忠
獻王功大更多智武皇既踐阼宮闕始清閤越邸矜微
勞寵極心乃異國有社稷臣讒巧惑聰睿遂輟股肱任
往重藩屏繫有威如雷霆有恩若元氣畊鑿比中土什
伍相錯置士忘遠戍苦民見太平治道路無拾遺商旅

畢懷惠忠獻一朝沒武皇亦遐棄駿尋延祐中權相擢
天位磨牙吮人血掉尾恣狂獬賊骨肉親迫逐見危
墜天人共震怒降灾及茲地大雪深丈餘人馬相枕斃
重為朝廷憂夙夜靡寧志除吏超五等聞者盡驚避蘇
公拜郎中即日辭九陞厚祿非所榮高爵非所貴彼民
亦天民安得皆坐視兼程到官所發廩急周濟死者何
嗟及存者再生遂閭閻漸蘇息竭力補黥劓飛書九重
天請為兵民備募粟實塞下慎勿憚勞費天子賜問勞

名王致金幣至今賴長策當時已多忌如何方賜環及
國竟長逝都人走相哭行子為歔歔崩騰朔風迅慘澹
浮雲曳蒼松拔其根黃鵠鍛其翅幸哉有令子名已注
簡記千秋常山下豪傑一揮涕

題羅稚川所畫臨川羅益謙溪居圖

迢遞臨川郡泱泱元獻里溪上君子廬閉戶青林裏連
山烟景晏斷岸寒沙靡日暮孤舟還荒村隔流水

寄題武寬則湖山堂

祝融九千七百丈六月飛雪灑洞庭攸輿學者武寬則
石鼓齋中窮六經氣橫瀟湘波浪白思入嵩華烟雲青
四千餘里到京國倒挿五色鳳皇翎河西猛將今太尉
一見握手坐廣庭立呼愛子俾受業豈獨汝學我亦聽
援肩虎頭日侍側長刀大劍羅青熒動陳忠義破肝膽
衆目睽睽開心局丈夫乖遇豈偶爾縱不我聽我則寧
嗟予官冷材力薄每辱奇俊哀矜孑天晴風靜輒過我
如病得瘥醉得醒不為湖山勞夢寐不為富貴疲心形

始知卓識出天性豈彼狗苟蠅營方今變臯滿廊廟
洪恩屢降無濫刑長材用世何不可大夫列卿如拾瑩
君如得位立行志慎勿學我空惺惺我今老矣何所稱
白雲深谷寒烟汀

十月十八日夜南郊齋宿夢先帝召見便殿手賜
橘花一枝有感而作

淚盡烏號不可攀傳宣忽降白雲間天華拜舞君王賜
夢斷齋廬月滿壇

寄題上饒鄭氏菊莊

上饒多隱者鄭氏善為方移居倪陽里種菊今成莊近
取徧吳楚遠求至帝鄉品類百十餘顏色不可常溉以
玉井泉樊以柳與楊晨興即造之不憂露沾裳有時忘
饑渴餐之以為糧門無催租吏家有白玉郎花前撫鳴
琴花下列壺觴興至輒痛飲飲罷卧其傍自謂得菊趣
不知與菊忘但恐秋景晏繁露結為霜盆盛虛室中虛
室仍面陽重簾護夕氣疎牖逗朝光亂以青青蒲水石

儼成行重得隱者心不辱桃李場玩物焉足計歲晚託
餘芳

題四清圖

一清曰王右軍平生富事業獨以能書聞遂令吳越士
至今學者猶紛紛于嗟乎王右軍

二清曰軒轅彌明偶成吟石鼎狂怪使人驚遂令韓吏
部至今妄得狂怪名于嗟乎軒轅彌明

三清曰玉川子忍窮吟月蝕天高叫欲死獨對烹茶婢

白頭赤脚老無齒于嗟乎玉川子

四清曰林和靖周程明聖學韓范輔王政獨對玉梅花
山色湖光耿相映于嗟乎林和靖

題新安許氏蘭秀軒

蘭生兮深谷漱流泉兮蔭喬木綠葉兮披披玉幹兮紫
莖植之兮堂下播芳馨兮菲菲菲菲兮揚揚思君子兮
高堂絃琴瑟兮會友嘉肴苾兮薦芳襲芳兮佩秀宜君
子兮多壽

夢題墨梅

霜空冥冥江水暮
江上梅花千萬樹
無端折得一枝歸
一雙蝴蝶相隨飛

寄題永豐劉氏暖翠亭

孤亭萬竹中危坐
自生風近與山光合
遙連野氣通
鳥啼深不見泉響
靜偏聰
束帛休相汙
先生道未窮
鷄山俯鷺溪
亭子畫堂西
流水茭蒲合
陽林竹樹齊
耕桑烟外集賓客
雨中攜萬事俱塵土
詩成手自題

寄題信州德元觀何真人林園長春亭

長春亭樹倚雲開，百里湖山入座來。
淥水繞階時自照，好花如幄手親栽。
青雲每指尋真路，白髮頻登望母臺。
墓在前山六月神龍起潭井，人間幾處待風雷。

題信上人春蘭秋蕙四首

深谷暖雲飛重巖，花發時非因采樵者。
那得外人知，孤芳不足幹奕葉。
自含滋白石蒼苔路，落花流水時
山深風露冷何處，有花開直入雲林去。
香沿石澗來。

幽叢不盈尺空谷為誰芳一徑寒雲色滿林秋露香

蔡七祖真人得朱文公所書讀書二字以名其亭
請賦

今人題扁古人書孔李通家意未疏萬箇猶嫌栽竹晚
百圍曾見種松初黃庭義密從心得白髮身閑對客梳
近有方平消息否紅蓮成碧藕成車

送陰陽蕭教授赴瀏陽

青草茫茫接洞庭瀏陽江上好談經遙瞻紫蓋為南嶽

仰見長沙是壽星日晏投書招楚客夜闌鼓瑟感湘靈
下簾高坐金錢滿賸買鹽梅寄在廷

賦得春鴈送張郎中省覲揚州

東風吹歸鴈離離翔天側朝發衡陽浦夕過陰山磧嘹
唳浮雲中萬里才一息春言思親者相望有南北

送聶太祝赴潮州錄聶天歷潛邸舊人

三載從容禮樂間仙曹新拜度梅關春風忍過金陵道
夜月重經黃木灣盜賊數州相應起甲兵諸道幾時還

憑君細講安民策莫遣邊防一日閑

題俞氏看雨軒

添澹來何處崩騰忽滿城遙連四山黑近灑半江明可
愛華間濕偏宜竹上聲中宵未可住高枕寄餘情

題江道士清虛館

遺紛極玄覽宴坐白玉京日月朗朝夕河漢流無聲冉
冉兩玉童雙吹紫鸞笙下視九九州浮以四大瀛萬劫
猶一瞬逍遙樂太清

賦得吳歌送人歸吳中

三月酒如澠高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔閭城且奉千金壽寧忘萬里情

文安集卷三

欽定四庫全書薈要卷一萬六千三百九十五

集部

文安集卷四

元 揭傒斯 撰

詩

題遠山圖

蒼蒼兮遠山飛瀑兮潺潺思王孫兮未還蒼蒼兮遠巘
飛瀑兮偃蹇思王孫兮未返白石之上青松之間上有
飛雲下有流泉悵王孫兮留連留連兮何極望青山兮

使予太息太息兮予獨思王孫兮如玉

題陳氏松巢圖

雲英英兮承宇松庚庚兮在戶問此何所兮廬山之陰
大江之潯雲可衣兮松可巢君何為兮不來予何為兮
延佇山則有薇水則有魚君歸來兮予與女同居

桂林歌贈明秀才

遠望兮桂林鬱蒼蒼兮窈深去無日兮來無期羌君子
兮勞我思皎皎兮明月桂偃蹇兮不可掇曠蕩蕩兮商

風發君思我兮遠百越

湖南憲使盧學士移病歸潁舟次武昌辱問不肖

名先奉寄三首

大德七年

昔賢懷出處到處非一端冥冥鹿門山寂寂東陵園千
載有其人常在羈旅間跂予欲從之路危不可干晨興
命徒旅驅車出重門南望江漢水北睇嵩洛原浮雲數
千里悵然迴我轅東風起空郊草色一何鮮百鳥縱橫
遊孤鵠摩高天援筆不可寫短意誰能傳

峒峒楚王臺泯泯湘水碧湘水深且清照影倦遊客
客本金閨人觀風戾南國漠然忽遐舉抗志箕顙跡榮華
衆所趨知者審損益嶽岑孤兔穴決漭風雨色常恐衣
上塵汙我林下石重華仰海宇夔高易為力去去君勿
遲憧憧孰云識

我本耕牧豎結廬章江涘微生屬休明世尚猶典禮驚
飈卷飛轍寥落從此始三年江漢春萬事隨逝水既昧
理生術復慚遊方旨豈無青山歸亦有桑與梓何為苦

留滯眷眷存君子君子諒不然東臯畢耘耔

黃鵠山聽雨得清字

玄扃息深構虛館含餘清瀟灑松上來瑟縮花間鳴遙
兼夜柝警暗與寒更并懷新感此別撫物愧生成土思
浩方殷春聲耿逾明幸及明知好達此旦暮情北首非
窮轅南山夢歸耕何言託毫素聊用款平生

贈別李時毅得南樓月

娟娟臨古戍晃晃辭烟樹寒通雲夢深白映蒼梧暮胡

床看愈近楚酒愁難駐鴈背欲成霜林梢初泣露故人
明夜泊相望定何處且照東湖歸行送歸舟去

送姜尚志得官後攜新妾歸省

淹薄徂年歲離別忽在茲寒城落木後虛館殘鐘時家在
雙井上心隨孤鴻飛落日布帆遠青山尊酒移蒼茫倚閭
情愴怳零雨詩託身名教中固應慎其儀志尚既不殊情
鍾自成悲昔見已云晚再會良無期濯足彭蠡水省侍高
堂歸鶴髮喜垂涕兒童問牽衣野老借檄看隣女隔牆窺

田園各成熟松竹遶柴扉親朋一在眼雞黍相提攜翻
知在家樂不恨為官遲放浪乘化遷何用世俗知

遊禪林寺喜得昌上人

靈臯懷獨往危軒泊間寂偶與塵事違况值禪林客深
苔剝脩玉輕霏澹凝碧覓見飛鳥還靜聞寒溜滴空明
會真賞漂流見良覲常恐心跡乖無由展平昔

奉陪憲使程公遊麻源第三谷宴藏書山房白雲

樓時三月三日

明公當暇豫勝日懷登臨蹠躑馬行窮窅幽人心縣
厓響晴雨犇流濯春陰雲門轉絕壑畫橋貫長林掃石
慨往運聞鐘知古音耆松有百圍突嶂踰萬尋小憩釣
魚臺聿瞻華子岑捫蘿入縹緲側逕凌蕭森坐我百尺
樓下有孤猿吟初筵俯曾顛微風散危襟語笑信忘我
觥籌浩難任豈不念永留惘然歸思深

送雷山人遊山

高人雨中至邀我遊山作自非冥寂人忍見紛華落方

春廼發軔殘雪猶映薄隨雲度神臯披烟望靈嶽晞沐
朝陽谷照影清水壑淹留皆隱淪往還必恬漠惟應樵
與牧時逢得奇藥歸來雖未期鬢髮終如昨

送孫志言遠遊

志士遊四海豈拘名利牽孫子三十餘懷策靡遑安仰
視流光馳千歲俄頃間青青鏡中髮閉閣守丘園昔者
限南北放浪徒空言曠然六合中何為惜飛翻晨裝既
云具良友咸在門依依別老親悃悃語弟昆出門即萬

里回首惟浮雲豈無骨肉念身負天地恩
白日出東峰
綠樹徧平原
歡會良未期
佇情何由宣
出處各努力
還歸觀所敦

贈髮者黃生

髮飾肇有虞大樸已雕刊紛紛百代下
巧密何多端
黃金間毫髮
文螺錯爛端
竹樹冠臺殿
祥雲隨鳳鸞
五采被牀几
豈獨匹與盤
坐使圭璧暗
所好移所觀
黃氏擅良工
出入三十年
馳譽必名流
迎致皆上官
美賈一朝

起羣工那敢班藝絕誠足貴古道何由還

送管錄事赴東平走筆作

十月燕地凍原野何蕭條征車臨長途行子去中朝濟
濟同舍生載酒集河橋子當撫嫗嫗行役在晨朝脫葉
辭高林散漫復風颭離鴻別杜渚嘹唳空層霄一觴不
盡傾何處相招邀東魯非遠邦錄事非冗僚矧宅夫子
地餘風諒非遙眷言懋殊績夙夕佇嘉招

廬山郭教授數相覓不見忽聞歸省却赴官雲南

奉寄五言一首為別以答願交之意

蕪謬忝詞館晨出歸恒夕親交猶自疎况乃未嘗覲誤
蒙君子賞驅車數相覓暮見門間題中夜猶怵惕反愧
應門子時奉冰玉色云何心所懽萬里西南役終乖攜
手好同是思親客過家君已先淹泊誰復識東風動楊
柳河水流不息何以展所懷中心著金石

和酬馬伯庸供奉史館間題見示二首

陰沈閔華館窈窕宜芳樹秋日透清輝晨飈翼輕霧飛

文盡威鳳擢質皆振鷺平生寡儔匹及此同散聚云胡
咸羈遊對酒恒不御羨君躡高第早聽傳臚句時從鴛
鴻侶縱轡驂騶路紬史吾豈堪讀書君不誤

飛葉滿京華青松臨廣筵連翩集軒蓋卓犖皆時賢青
松豈不高衆草自芊芊感此理文翰恒恐迷所先蒐獵
殘缺間終歲不成編矯情或傷直含辭非取妍宣尼萬
世標斯道庶昭宣元功既森列羣策咸牽聯終焉懼非
才申旦長惕然

重送曾應奉及周鄒諸君子

晨興戒徒旅行子即長路天衢風雨過升陽在高樹發
軻東南門解櫂紛往緒迴瞻彤庭闕髣髴玉堂署遺榮
誠所難勇退無枉步聯翩數君子意氣更相慕文采掩
春華清言敵朝露超遙去留迹曾何悟情素懿此昌明
時各有丘園趣

熊英德哀辭

靈飈戒先路疊鼓中夜發旌旒揚廣衢輶車出城闔素

縷紛前逝疏麻森後列罔罔迷據依營營會精魄流雲
冥飛蓋平野一何闊慟哭積水濱哀歌青林樾翔鳥為
迴薄我馬如顧秣農夫釋耒嘆行子憑蹊惻共隱善人
喪矧承君子列平居異山隴累別兼歲月規戒晞暮齡
歡燕中道歇時哲衆所屬六十非短折撫物自傷摧瞻
望猶恍惚南轅憚歸旆北首悽往筏千春驥岑趾流藹
餘篇帙宿草日已深聲容閔幽沈

雜詩

東風吹百草沿路一時生繁桃與夭杏徧野復盈城東
隣宰肥牛西里按新聲孰不乘時節為樂快心情平明
出南郭登高望帝京大哉山河固喟然獨撫膺

社日玄鳥至入我高堂飛舊泥幸未拆新泥復相依豈
徒安爾身復欲長其兒言語嬌且閑上下遞差池勿因
秋風起相逐忽還歸

嚶鳴出深谷草木皆華滋昨日悲嚴霜爛熳揚光輝雞
鳴車馬動日暮交橫馳賤士錦鞍韉貧女金裳衣各願

得所欲及此艷陽時

青青孤生松高出浮雲中下無嘉樹林上有萬里風俯
視原上草秀色何豐茸自顧豈不高獨立難為容常恐
本根蠹委此蒿與蓬

城南有名園車馬何喧喧綠池夾高柳百草朝且鮮平
明集高臺日暮不能還美酒百壺少豐厨豈論錢麗服
羅四座急管應繁絃燕歌儼成行趙舞交蹁躑但得主
人顧陋質自成妍還過舊遊處池館謾依然

寓興五首壽吳大宗師

古稱仙人乃自秦漢間由來英雄士重已輕人寰子
房遇黃石取履非所艱一朝從赤松高風安可攀我生
後千載獨立當玄關

昔有安期生本是漢奇士高視羣雄間竊鄙蒯徹計學
道滄海上却粒咀元氣一食如衣裘金石焉足貴超凌
八極外洞達無始際時從王子喬吹笙下遊戲吐爾燕
齊人宿留安可致

方朔起平原高志凌紫氛上書三千牘長揖萬乘君淪
跡寄中朝高爵固非羣繾綣緣世主諧笑匡國均三食
王母桃不受王母嗔高風軼萬代誰歟繼清塵

伯陽閔衰周西度函谷關誰令守關者再拜希一言歛
容為之陳文字至五千聊因令尹啟本欲使之傳煌煌
百代下繼者良獨難

赤松隱崑崙廣成在空同德為王母歸道與軒轅通既
枉赤水駕時欵玄圃宮先天本非始後天亦無終自非

玄德人誰能躡奇蹤

雨中作

孟夏涼風來吹我羅裳衣此服豈不稱炎暑方及期婉
戀庭中花煌煌有光輝自信好顏色何能與時違冥心
委元化勿為後世嗤

送劉旌德

大火流坤維西風集庭柯積潦不歸壑浮雲鬱鬱塞我山
東擁盜賊剽石疲征科嶺外兵不解湘南及干戈郡縣

無良材平人嬰禍羅宓氏彈鳴琴言游亦弦歌劉子宰
旌德為治當如何

題淵明撫松圖

抱拙辭下邑曠然獲所安孤松臨廣園聊且共盤桓清
晨散遊策日入自當還霜露不相貸時物倏殊觀茲植
焉所貴昔為聖者嘆

題趙子昂寒翠圖

石潤欲生雲山寒疑有雨高林葉盡脫低篁綠堪數因

知靜者要更覺王孫苦小草枯樹根茸茸欲華予

初至京師和荅友人病中見示

志士輕離別貧賤事多違秋風車馬中故人高卧時
遠客江南至塵土滿素衣既申離合情中多勞苦辭歡笑
未幾何感嘆已乘之欲及田里事復恐疾疢滋疊疊流
景遷榆柳各變衰偃息寄一室朝夕終在茲委運復何
言人生信可疑我獨何為者日出暮來歸

重錢何太虛

雞鳴曉色動行人出南郭徘徊望車馬飛雪何漠漠巨
野四面平中路淒以索黃狐超客過驚鴟向人落結軫
赴悲笳凝酸屬哀角時逢古人跡因究平生學迴首睇
關山低心望蓬蒿離合兩不期思懷獨難託

贈洪參軍兄弟

洪氏起遼海流章耀八紘孝友根世學忠貞自天成入
為帝羽儀出秉國鈞衡洋洋高門居濟濟羅公卿籍甚
澄與瀾玉質金為聲析理貫秋豪摘藻豔春晴朝趨承

明內幕進賢友生衣錦絡尚絅穆然含粹精靈鳳非求
知出為世所驚竒璞隱崑崙采充清廟英堯湯攬羣才
聖道日光明豈惟殷膚敏裸將在周京蒼天雖云高乃
心此黎氓君臣兩不易相期底隆平君德貴并包臣道
戒驕盈立賢必無方拔茅思彙征勗哉敬厥終兩賢信
國楨

送馮尊師還岳陽

馮公住天岳夙抱丹霞賞結構何威巍連延瞰高爽飛

縈帶遙甸周覽春泱泱日落長沙明風迴洞庭響事因
多病簡道與流年長郡邑費招邀賢豪畢知獎翳然庭
中樹宴坐寂餘想流雲時縱橫幽弄自來往還因採靈
藥相覲稽神壤悵望忽言歸川塗日脩廣

題山水卷

稍稍雲木動藹藹烟峰亂遠浦引歸橈雙厓臨絕岸方
思隱淪客欲結漁樵伴水濶山更遙幽期恐汗漫

題清江黃氏池亭亭名玉壺水

新亭環碧池池水何漾深偶攜塵外侶薄言此窺臨惴惴若有畏憑憑如弗任既抱執盈念仍懷履薄心白日麗清暉微風在遠林洞達忽無際澈明諧素襟還君玉如意理我雲門琴

三月晦日送春得詩字

變化無終極形氣遞推移昨日名園中徂春忽在茲曄曄華林彩繁陰綠成帷從結遊女懷祇增志士悲況此客行子風水積川坻撫壯思始榮臨芳念將衰安知盛

長後不有堅凝時俯瞰江水流仰與東風期各言早還
歸毋勞東山詩

題陳椽菊逕

達士隨所適跡異心恒素時從府中歸問菊松下路初
欣碧叢長復愛繁英布灌以古井泉申之九秋露有酒
共斟酌無人還獨步結意常恐非留懽輒忘暮高天遙
澄穆平川澹容與落日明歸禽疎籬繞蒼樹懷芳諒為
美居榮宜云慕矯首今何時孤雲為誰去

題蘆鴈四首

江湖處處非況汝一身微如何却欲下只合更高飛
自不作雙飛沙頭叫向誰碧天無限好何處不堪隨
朝飛自作行夜宿更成雙誰能如此鳥和月占秋江
寒就江南暖饑就江南飽莫道江南惡須道江南好

題李陵送蘇武圖

一與故人別死生寧復親休言典屬國猶得畫麒麟今
朝送漢節迢遞入秦關惟有沙場夢相隨匹馬還慘澹

河梁路參差塞上山誰言是死別日夜望生還

題風烟雪月四梅圖

逍遙芳樹下解石寒花發立盡晚來風明朝恐成雪
高花開幾點澹靄拂成衣遙瞻應不見相對尚依稀
年年霜雪裏得見此花開此花元不筦一任雪霜催
玉樹臨風好更於明月宜空山冷相照未必有人知

題牧羊圖

求牧既已得敗羣還復去白晝捫蝨眠清風滿高樹

題草蟲圖二首

傾陽朝莫同忘憂歲年改蜂蝶那得知側翹方采采
有竹不必多有豈當自熟坐看蜻蛉輩日晏紛相逐

再題二首

種藥都防憂滋蘭總為春青蛙與蜥蜴何用亦紛紛
直節直彌堅弱蔓弱空纏微霜一夕降蚱蜢亦悽然

題石頭和尚草菴圖

青天不可量好風亦無價試覓菴中人蕭然古松下

題何尊師畫牛圖圖惟一牛並無坡岸草樹人物
之屬

莫是度關者寧非喘月時茫然天地內誰問復誰知
題柯博士為方叔高所畫墨竹

蒼蒼四君子意氣侵雲端六月不敢近蕭蕭風露寒
丘氏南陵月磯亭

明月滿灣碕先生獨釣時漁人渾未識惟恐白鷗知

題四梅圖

一兼松竹
一兼水仙山礬

一兼雪月
一兼蘭與芝草

小徑蒼松側疏籬翠竹間相逢如有約久立不知還
亂蘂遠難分寒香近却聞何人心與迹於此可同羣
誰將配水仙更欲比山礬試問花知否臨風笑不言
芝草黃金色蘭心紫玉蕤忽從花下見可恨不同時

送阿英童歸揚氏

弱女年十三兩年失母慈看拜阿婆去憶着初生時

野鴨詞

野鴨雙雙沒輕鷗兩兩浮人生亦如此那有別離憂

題雪竹初霽圖

已奮尚離披連朝被壓歌虛心與直節唯有太陽知

題蒲萄

翠實肥初熟瓊漿迸欲流向來為酒者一斗博涼州

文安集卷四

欽定四庫全書薈要卷一萬六千三百九十六

集部

文安集卷五

元 揭傒斯 撰

詩續集

飲酒篇悼亡後作

昨日飲酒酒苦薄今日飲酒心不樂未知明日還如何
枝上落花能許多蝴蝶飛飛春草草對語黃鸝清且好
有酒有酒且莫沽庭前獨宿鴛鴦雛

從他痛辭 并序

江少虞類苑載開寶中金陵人修故瑩得石記隸書從他痛凡數百字末復云不為石子盡更書千萬箇從他痛未幾王師渡江余謂此必埋恨者非渡江讖也作從他痛辭

石可絕恨不滅日月雖光明不照石上情情深化作秦淮水水流成血波濤起流入東方大海中風吹復向秦淮裏秦淮裏深復深土齧石上字字字痛連心從他痛

秦淮水空相送除是相逢話痛時始是此心無恨期

吳歌一首送張清夫提舉征東校官先還吳中

吳中女兒白如華吳江燕燕拂波斜吳中魚肥米可束
夫君無事久忘家夫君自別吳江水聲名籍籍京華裏
家家屏幃待新詞日日王侯置醴吳中之居不可踰
京華之樂天下無高官厚祿不願有上疏乞官遼海隅
秋風高吹燕山樹扁舟且向吳中去吳中兒女白如玉
看着新袍入華屋

贈許道士

廬山道士許自然二十武當學飛僊白雲冥冥不可見
天際時聞清嘯傳虎將乳子共遊戲龍化老人同食眠
無求始悟身非患有道方知世可捐忽聞賣藥入都市
便欲乘風凌紫烟紫烟之中曠邈邈下視人世真堪憐
爾曹齷齪塵埃下何日南山歸種田

題李見心小蓬萊

媧皇狡獪弄餘智手挿神山滄海裏不教寸碧落人間

弱水更環三萬里何人搏土為此奇太乙真人謫僊子
芙蓉為舟桂為楫碧玉連環白雲履山根植棗漸如瓜
山頭種玉今成髓平生九州視一毫秦皇漢武空勞勞
山林冥杳百鳥號明月飛出琴聲高

黃母吳氏挽歌

新安之水清且深深深如見黃母心新安之山高且烈
烈烈如見黃母節母也不幸早娶居三十未有二十餘
六十餘載一日如子又能孝孫詩書嗟母之德靡不宜

人歌不足國旌之爾今死矣歸何時新安之山可鑿而
夷新安之水可陸而馳黃母之德不可思

送墨工潘生還臨江

豫章朱氏以墨名直與郭玘爭豪英臨江潘氏得墨法
乃自柯山翁彥卿朱氏親承天子詔墨入奎章獨稱妙
潘氏近日來京師羣公得之惟恐後潘云吾墨猶草草
盡藝為之當更好明年此際來京師始知吾墨堪為寶
東風蕩蕩吹燕山行人冉冉掉臂還明年獻墨奎章閣

却與朱氏分朝班

武岡扶丘山紫府延壽宮宋張真人守靜所居也
至今禱雨暘輒應其徒純真子饒君禮誠延祐
中入京師為今玄教大宗師吳公所知居太乙
延福宮十五年將南還山中詩以送之

洞庭之南扶丘之山縣連九疑控百蠻昔在嘉定之世
真人張氏隱居學道於其間祈晴即晴祈雨即雨犇走
郡縣勞躋攀鋤雲架霧開紫府采芝種朮留朱顏夜驅

猛虎守庭戶晝役鬼物除榛菅真人乘雲上天去但有
青鸞白鶴長往還雲霓尚與司豐艱爾來一百五十歲
弟子饒君通道氣一住京華十五年太乙宮中獨超異
不求逸少寫黃庭欲逐浮丘攬香袂南望悽其憶故宮
黃河日與夢俱東河流到海不復返故宮長在白雲中
天地無停機日月無淹軌歸去來白雲裏

題漁樵問答圖

我在孤舟爛醉來君從何處看棋回高山流水元同調

明月清風不用媒江上柳早先摧天上鴈正徘徊富貴
何如歌一曲功名爭似酒三杯我但負薪君但釣百年
誰喜復誰哀

題劉商觀奕圖李伯時臨蘇子瞻跋茅君彥刻

劉商畫手神運筆龍眠臨之如已出不知奕者何代人
雖無名姓若有神神凝志定萬緣息觀者亦復遺秋春
松風吹衣石泉響朱草叢生玉芝長眉陽仙客最相知
更託茅君寄心賞

題陳所翁雙龍圖為寅上人作

雙龍畫壁玄淵開萬物顛倒隨雲雷龍公被髮向空寫
身是真龍非畫者鐵作鬚鬣玉作鱗電出兩目雲繞身
偶然會合此何處仰面向天天不嗔世間眩轉空形影
倏忽變化那能省高僧說法夜來聽誰道相逢非夢境
斗牛蒼蒼風雨暮泉阿豈識延平路當時縱無雷煥與
張華未必終藏不飛去

題玉筍山邵道士所藏米方奉使贈劉道士

紫帽山人方孚若臨江謫居亦行樂二十四礪緣源行
三十三峯看月明奉使不愧蘇子卿招隱更遇劉侔平
劉郎彈琴震金石方公作歌酒和墨一時意氣傾座人
千載風流寄仙籍兩公一去無消息竹下松間盡行跡
遺墨蕭條銷白雲山中歲歲桃華春宋金往事無勞問
夜夜虛壇候子真

題彭尊師禱雨詩卷

道人役雷如小兒顛倒鬼物愁蛟螭祈晴得晴雨得雨

身不勝衣膽如虎東通吳越北淮漢到處逢人憂水旱
手提豐歲與疲甿金帛盈庭未曾看閩山疊疊躋金峯
蘄山叢叢碧玉宮洗劍長留雙澗月彈琴尚憶萬松風
大臣無端薦天子十年留滯京華裏悠悠扈從春復秋
歸心已逐東流水去年天下旱且蝗流殍滿道無人藏
安得君等遍八荒不使水旱憂堯湯

題春龍聽雷圖

雷之馮神龍興雲行雨施四海清雷之震神龍奮雲行雨

施四海潤雷之令神龍聽雲行雨施四海慶聖君在上
賢臣在下我無事而觀化

蔡氏四適堂

君不見車轆轤長安陌上爭馳逐朝出遊暮還宿問何
所得榮與辱又不見或漁于淵或樵于山或耕或牧其
心和且閑我欲從之生羽翰豐之東麗之陽有美一人
大溪之旁水竹兮蕭蕭雲木兮蒼蒼彈鳴琴兮不下堂
禾在園新在屋黃雞皮白魚腹嘉客來新酒熟君之樂

今惟日不足

題邢先輩西壁山水圖

邢家蒼蒼西屋壁萬壑千崖動寒色大江忽轉天地迴
浮雲孤飛日月白參差樓殿照林紅松檜悽迷起朔風
崑崙蓬萊不可到赤城白帝遙相通賤子平生尚竒偉
南極衡湘北幽冀復從大駕上灤京始接邢君多意氣
君昔扈從戎馬間少壯不知行路難月明飲馬長城窟
雪深射虎祈連山萬里歸來太平日坐我江山百憂失

平明萬騎出天門又駕官車就行役

送黃判官歸江西

西辭夜郎國北上邯鄲道方厭東華塵又說黃平好黃
平遙遙度五溪五溪更在洞庭西十年世事浮雲裏一
日孤舟萬里歸桃花流水孤舟客白髮青山五色衣堂
上慈親稱壽處堂前新婦拜姑時隣人邀種南山豆野
老同尋北谷芝人生出處須經意富貴悠悠差是非

和劉修撰十二辰詩

掘鼠可以充饑飯牛可以待時何須入穴求虎子更學
狡兔三穴為我生誤逐攀龍者歲蛇冉冉那堪把又無
筋力騎快馬日射黃羊陰山下空餘野性獼猴同但求
歸作祝雞翁柴門狗吠閑閣睡萬事渾如牧豬戲

發臨湘得風

臨湘縣前江水流茅廬沽酒大如舟莫道天風不相待
一時吹上岳陽樓

聞西師捷口號二首

聞道西南掃蟻封何時雨露洗妖氛必行往代羈縻策
肯倚窮荒戰伐功

萬里春風送捷書千年王氣拱皇居越裳白雉應頻入
浪泊飛鳶正念渠

漢茶陵侯廟

高帝安劉慮未危賈生可恨不同時長沙更有回旋地
千載茶陵無古祠

泉子嶺作

已過泉子嶺頭路荒甸茫茫碧草乾
日落不收牛馬亂
青烟起處是營盤

金衣翠帽路傍女蹋足連聲駕犢車
車下晝眠車上宿
每逢水草便為家

北樓雪後酒醒獨吟

幾點微雲翳曉晴半峯殘雪隔江明
小樓獨對春城北
酒醒匡牀聞鵲聲


聞熊從嘔血亡

碧血凝秋萬事空此生無復一尊同到家又近重陽節
應是哭君風雨中

待潮

扁舟夜閣寒沙際歌枕待潮紅日高無數征帆背人去
海門何處水滔滔

文安集卷五



總校官庶吉士

臣

侍

朝

校對官檢討

臣

蕭九

成

謄錄舉人

臣

李

馮

欽定四庫全書薈要

集部

文安集卷八

六至

詳校官助教臣謝登雋



欽定四庫全書薈要卷一萬六千三百九十七

集部

文安集卷六

元 揭傒斯 撰

表

金紫光祿大夫山東行尚書省兵馬都元帥知濟

南府事特封濟南公致仕贈効忠宣力佐命功臣

榮祿大夫司徒柱國追封齊國公諡忠襄張榮加
贈推忠宣力正義佐命功臣太師開府儀同三司

上柱國追封濟南王仍諡忠襄制

朕纂承基緒每思創業之惟艱褒卹勲勞常恐推恩之
未至況山東諸侯之起皆天下良將之雄既盡厥忠宜
豐其報某官沈幾先物遺愛在人方保有齊民已知真
主之受命及歸我太祖歷事累朝而致身秣馬南征則
孱金亡走拔劔東指則逆壇就擒握兵柄者餘四十年
未嘗妄殺臨軍陣者凡數百戰動必有功故詔有張相
之稱而世任元戎之寄雖列土之封猶及於懸車之日

而漏泉之澤未究於蓋棺之餘況在爾孫復為朕使或
守藩維於外或司喉舌於中世篤忠貞人推謹慎是用
因爾山川之履增爾勲號之崇秩既陟於三公爵仍超
於五等乃爾自致非朕敢私於戲紫綬金章尚念初來
之日丹書鐵券永膺異姓之王神其有知服此加命可
妻齊國夫人宋氏進封濟南王夫人制

昔國有東諸侯既封於濟今朕嗣大歷服申爵以王載
求齊體之賢宜與從夫之典故某官妻宋氏早以令德

相其良人舉五十萬衆以歸朝歷三百餘戰而盡節分
茅胙土傳及子孫襲組黼纓布列中外皆爾相成於警
戒用能共濟於艱難是用錫爾鄉閭貴其爵號以篤爾
後以報爾前於戲翟第魚軒尚服異恩於永世虎頭燕
領從懷舊將於當年其迪爾家以贊皇國可

諸王呼圖克岱爾追封雲安王諡忠武制

昔我世祖親定雲安命九王以鎮之將百年於茲矣乃
者國家多故邊圉失宜健將驕王遂據城而稱亂陳師

鞠旅方下詔以討平粵有忠烈之臣乃在伯叔之籍爰
申褒卹以慰死生故呼圖克岱爾沈摯有謀剛勇獨斷三
世藩輔蔚為磐石之宗一心朝廷不忘社稷之計方天
歷之反正而遠人之未思中慶則伯忽要盟即飛章而
上變烏撒則僂余既叛先率衆以抗鋒見危而奮不顧
身力戰而繼之以死報已後矣朕甚憫焉雖析爵以列
侯王何裨地下仍賜錢以給妻子式表予衷嗚呼為子
必孝為臣必忠既克承於我祖無言不酌無德不報尚

永碩於爾邦魂而有知服此休命可

諸王羅羅丹追封保寧王諡昭義制

臨戰陳而思孝必有勇功於板蕩以盡忠斯無愆義往
在諸父羅羅丹世鎮南詔心貫上蒼適嬰天歷之兵獨
戰羅雄之境力竭而援不至兄死而弟亦隨山川以之
興悲日月為之動色有宗王而盡節宜諸將之同心遂
使叛亡無不俎醢非褒卹之獨後屬內外之多虞故疇
爾庸超五等而命爵載考爾行詔百世以易名申錫綬

錢以給家屬所以昭國典所以勸遠臣噫得猛士以守
四方孰如同姓明俊德以親九族尚監異恩可

申命三十九代天師張嗣成制

朕惟老聃度函谷關未始忘於天下留侯從赤松子豈
果棄於人間式啓聖人神道設教之門遂任天子為民
請福之寄主其法者代有功焉不遠而朝宜新厥命翊
元崇德正一教主嗣漢三十九代天師太玄輔德體仁
應道大真人主領三山符籙掌江南道教知集賢院道

教事張嗣成神明之裔道德之宗自爾祖之遇世皇蓋
有天意洎乃父之於仁廟益簡帝心雖有道之長實係
聖明之世而無為之治庶聞清靜之風誕播玄休屢昭
靈應卿既克承於後朕亦丕勞爾先往者海水為灾再
免黔黎於昏墊近而天時作慝三致雨雪之感通功成
弗居禮宜有報噫神仙以忠孝為本尚母愧於傳賢帝
王以天地為心曷敢忘於敬德見所帶職號悉如故

進至大聖德頌表

皇帝福蔭裒江南布衣臣揭傒斯言恭惟正月七日皇太子暨丞相百僚耆耄等以皇帝陛下出撫邊陲入繼大統豐功盛德高出千古握符御極宜獲徽稱即日詣大明殿冊上尊號十有一日躬事太室獲瑞雪之應二月十有三日詔告天下覃恩中外天人協慶日月增華凡具性情莫不欣戴宜形歌頌以達和氣臣傒斯誠惶誠懼頓首頓首臣聞古者聖人之歌莫先於詩故聖主賢臣有大功顯行必載之詠歌使天下曉然知君臣之

所趨德化之所由見善而遷聞義而起去之萬里如立
其朝後之萬世如生其時所以事神保民無右於此故
有虞命夔以教之周制太師以掌之君臣朝燕必有賦
郊廟薦享必登歌蓋詩之為道誦其辭無鉤棘叢雜之
繁聆其音有往來䟽數之節玩其義有優柔沈蘊之旨
其感於人也易其入於人也深乖沴之氣可變而為祥
風甘雨姦回之行可化而為忠鯁貞良是以聖人尚之
故雖反覆典謨訓誥之文不若歌明良之賡康衢擊壤

之謠周南召南之什下至農野婦豎一闕其耳熙熙灝
灝想見其治漢魏以來騷人賦客時時間作雖不能盡
追古道其抒情蓄志可興可觀斯義絲絲庶幾未泯聖
明之世尤所宜聞欽惟統天繼聖欽文英武大章孝皇
帝陛下道準天地德繩祖考惠澤周乎無間威稜疊乎
八表舉前王未究之禮敘洪範載錫之疇孝弟足以厚
黎民剛明足以制萬幾見賢如己能聞諫如己出去惡
如薙草芥好善如嗜飲食允文允武赫赫巍巍宜其克

集大勲君臨天下載膺顯冊彰厥大猷而耆俊如雲良士如林必有振發毫楮鋪張洪業為一代之盛典若微臣者曾何足云然想像於丘岑畎畝之中不若覩快於輦轂之下繼漏於筐篋刀筆之末不若聲諸詠歌之間近可以風動四方遠可以流耀無窮臣自揆才薄迹微無以補益毫髮幸因羈旅獲際盛明謹撰聖德頌一篇繕寫投進雖不足以加天地之大日月之明載之簡牘傳之天下亦可以見聖明德化之所由也臣無任瞻天

樂聖激切屏營之至謹奉表以聞臣僉斯誠惶誠懼頓
首頓首謹言

皇太后加尊號監脩國史府賀表

延祐二年

聖主尊親稽先朝之盛典慈闈進號備昭代之徽稱寶
冊載膺瑤圖永固

中賀

欽惟儀天興聖慈仁昭懿壽元

全德泰寧福慶皇太后陛下德全坤厚功底泰寧福莫
大於多祥兩開帝業慶莫隆於至養咸戴母儀式兼崇
極之名益衍昌明之祚臣某等久塵台鼎叨總國書興

聖春融幸仰陪於大禮含飴日永願丕贊於鴻猷

天壽節監修國史府賀表

一人有慶節肇紀於重三萬壽無疆位永乘於九五乾
坤薦祉朝野騰歡

中賀

慶惟皇帝陛下道大德純功崇

業廣舉賢能興學校天下文明異章服同車書海內率
俾允極尊親之孝益隆致治之基臣某等任忝國鈞職
嚴金匱蓬萊宮殿幸依日月之光河洛圖書丕續皇王
之統

元旦翰林國史院賀皇太后表

延祐三年

天子當陽八表奉夏時之歷皇闡獻歲萬年稱元旦之
觴雲氣蓬萊春風宇宙

中賀

欽惟皇太后陛下德含坤育

運啓泰亨推福慶以致崇日星顯號溥慈仁而協治雨
露群生陰教修而母道隆孝理彰而聖功遠臣某等欣
逢盛旦忝綴周行玉署日和願播思齊之美瑤圖天廣
永居長樂之尊

天壽節代蒙古國子監賀表

延祐三年

一人受命適符上巳之辰萬歲稱觴載協壽星之紀照
臨所被慶抃惟均中賀欽惟皇帝陛下德猶日中養以
天下暨聲教於四海俗美風淳舞干羽于兩階河清嶽
晏益體乾剛之用式隆震夙之祥臣某等學守國書班
聯胄監龍顏日角仰瞻穆穆之光鶴算龜齡俯效綿綿
之祝

上再即位奎章閣賀表

天歷二年

六龍啓運飛躍得聖人之時萬象趨新變化合太平之

應普天之下如日再中

中賀

欽惟皇帝陛下剛健粹精

聰明神武霜露渥更而不失其正乾坤再造而不居其
功惟其有帝堯帝舜之聖仁乃能行祖甲祖庚之揖讓
慎徽五典則崇孝友以率先表章六經則進儒雅以為
本皆天理人心之至當必明君義辟而後知宜歷數之
在躬雖同體而不易况祖宗之大統豈違道所可求是
以踐祚之初甘露卿雲諸福畢至及夫明詔之下扶桑
若木萬姓歡呼允長馭於權綱斯永保夫社稷臣某等

叨聯延閣適際清朝義畫禹疇願闡皇王之秘虞韶殷
輅丕昭禮樂之隆

奎章閣賀正表

天歷二年

大人有造治隆揖讓之餘正月始和慶協發生之妙車
書萬國干羽兩階

中賀

欽惟皇帝陛下道接百王統承

三正達夫郊社之禮禘嘗之義躬致其嚴觀乎天地之
德日月之明益躋於聖是用格于上下莫不歸其照臨
臣某等恭惠西清依光北極君臣父子永敦天秩之常

禮樂詩書誕播皇風之盛

冊皇太子奎章閣賀表

重明麗正作離咸仰於皇文一索得男出震允宜於主
器既疏封於立土爰正位於青宮所以繫人心所以本
天下欽惟尊號陛下敬隆郊廟德洽乾坤當春秋鼎盛
之時建宗社靈長之計惟聰明可以正百辟俾綜樞機
惟元良可以貞萬邦足副儲貳重以群臣之固請聿遵
累聖之宏規然監國撫軍教尤資於四輔而問安視膳

禮必謹於三朝式養聖功用光帝業臣某等屢陪大慶
思贊清時迎春日之載陽益臻泰道瞻前星之有耀永
固皇家

聖節賀表

陽德方亨喜太平之有象聖人在宥宜仁壽之咸臻八

表同歸萬年惟永

中賀

欽惟皇帝陛下誕敷文德克纘

武功既尊祖以配天比隆三代乃立嫡以主器用貞萬
邦允昭仁智之端是皆長久之道臣某等叨陪清宴莫

贊聖明多壽多男徒切華封之祝是彝是訓願敷皇極之言

奎章閣賀表

聖人繼體再昭揖讓之隆天下歸仁大慰平成之望慶
綿宗社光被華夷欽惟尊號陛下德秉純乾業承富有
妙天人之協贊允歷數之攸歸惟上有成康之君下有
周召之臣而內獲臯夔之佐則外獲唐虞之治苟日躋
於聖敬咸世篤於忠貞臣某等職忝西清光依北闕經

邦論道自有弼於鴻猷養老尊賢豈無裨於昭代

藝文監賀表

明繼明聖繼聖所以固皇圖長以長賢以賢所以公天
下一人有慶萬國歡心

中賀

欽惟尊號陛下仰之如天

就之如日體兩朝之揖讓有不丕丕基開萬世之隆平惟
明明后此祖宗之深望亦臣庶之所期臣某等地切泰
階恩聯文苑周為師而召為保德冀邁於成康稷教檣
而契教倫治永躋於堯舜

藝文監賀表

一人受命適嚴踐阼之儀百辟在廷已舉尊親之典孝

先天下慶衍皇圖

中賀

欽惟皇太后陛下德濟艱難功

成警畏每念鴻圖之重獨深燕翼之謀申揖讓於中興
父而又子導繼承於成命長亦惟賢宜膺至養之隆永
極徽稱之盛臣某等名慚藝苑身際熙朝長樂怡愉願
密扶於聖治大明照耀庶丕闡於皇猷

藝文監賀表

成命以長惟天以啓聖人南面受朝不日而尊大母愛
敬之至神明所歸中賀欽惟尊號陛下如日東升以天
下養雖任寄伊霍之重足以發皇明必治資任姒之賢
有以基王化尚致怡愉之樂式彰孝弟之風臣某等學
愧前修職嚴內監仰陪大禮時已際於風雲共戴皇猷
壽永齊於天地

文安集卷六